

CONVENIO ELECTORAL 2009

- Red Democrático participante na eleccion pa miembro di parlamento di Aruba, cu ta tuma lugar 25 di september 2009 (asina jama **PARTIDO POLITICO**) y
- Comision di Bon Boluntad (asina jama **COMISION**)

reconociendo como punto di salida

- *nos reglanan legal pa partidonan politico (Lv. Politieke Partijen – AB 2001 no.96)*

y

considerando a base di respet mutuo

- *e necesidad di un campaña electoral limpi y di nivel halto;*
- *e necesidad pa garantiza oportunidadnan igual pa cada partido politico den proceso electoral;*
- *e necesidad pa evita actonan di violencia y destruccion na cualkier momento;*
- *e derechonan fundamental di libertad di opinion y expresion;*
- *e importancia di mantene nos norma y valornan;*
- *e importancia pa atene na stipulacionnan di articulo 132 di nosCodigo Penal cu ta prohibi cumpramento di voto dor di partidonan politico;*
- *e necesidad di acudi cerca, respeta e permisionan otorga y e orientacion di e autoridadnan competente encarga cu mantenimiento di orden y seguridad publico;*
- *e necesidad di prohibi te cu 100 meter pafor di e urna electoral pa molestia e votador y toca musica duro pa influencia e votador o vocifera mensahenan partidario via equipo di sonido ariba dia di eleccion;*
- *e importancia pa prohibi actonan cu e meta pa stroba miembronan di partido politico pa funciona, pa trese e proceso electoral na peliger y pa destabiliza nos pais.*

ta combini pa conhuntamente stipula, acepta, vigila y cumpli cu reglanan pa e proceso di campaña electoral.

E reglanan ta lo siguiente:

1. **PARTIDO POLITICO** (incluyendo nan dirigentenan, seguidornan, campañadornan y otro voluntarionan) lo abstene di:
 - a. acepta donacionnan (placa y material) di fuentenan liga na actividadnan criminal/ilicito y/o cu ta mara na un contraprestacion.
 - b. uso di fondonan publico, propiedad, material, equipo y recursonan humano (incluso “ter beschikkingstelling”) di gobierno, companianan estatal y/o institutonan publico pa metanan politico.

- c. nombracion y promocion di personal den servicio di gobierno, companianan estatal y/o institucionan publico cu metanan politico;
- d. uso di publicacion di documentonan y informacion confidencial di persona o empresa pa metanan di difamacion, sea anonimo o no.
- e. uso di vocabulario cu contenido instigante, insultativo o calumnioso, irrespecto cual medio di comunicacion;
- f. maluso di declaracion di tercera persona incluyendo mucha o difunto den spotnan comercial politico (voz y imagen);
- g. ponemento y uso di bandera, borchi y stickers o cualquier otro material di propaganda politico den cualquier forma riba:
 - palonan di luz, borchinan di trafico y otro propiedadnan publico y urnanan electoral;
 - propiedadnan priva sin permiso;
 - no dañá nos medio ambiente o naturaleza, por ehemplo rosando mondi pa pone borchi, bandera, etc.

Na momento cu e convenio aki bay na vigor PARTIDO POLITICO ta compromete nan mes pa kita e materialnan di propaganda cu ta poni caba.

2. PARTIDO POLITICO lo enfoca riba e programa di nan partido politico pa e siguiente periodo di gobernacion (conforme estipulacionnan estatutario di e partido politico), dunando un posicion claro y di principio ariba asuntonan importante den nos comunidad awendia. Den caso cu e programa ta inclui proyecto(nan) e partidonan politico lo trata di ilustra su beneficio(nan), costo y metodo di financiamiento.
3. COMISION y PARTIDO POLITICO lo instala conhuntamente un Cuerpo di Supervision encarga cu e tarea di supervisa y di raporta na COMISION. E CUERPO DI SUPERVISION lo mester consisti di
 - un representante di cada partido politico firmante di e protocol aki;
 - un representante for di grupo di dunador di trabao;
 - un representante for di grupo di trahador;
 - un representante di clero;
 - un representante di Parlamento Hubenil;
 - un representante di enseñanza y
 - un miembro apunta a "titre personnel" cu ta fungi como "liaison" cu prensa.
4. En caso Comision di Supervision determina cu e reglanan stipula den e convenio electoral aki a ser viola durante e proceso electoral, e comision tin e tarea di sanciona y por tuma accion pa medio di:
 - denuncia publicamente violacion di e convenio electoral 2009;

- den caso di acto violatorio di ley, trese esaki bao atencion di e autoridad competente;
 - ta recomienda victima di acto castigable pa ley pa haci denuncia na autoridad hudicial.
5. PARTIDO POLITICO ta declara di ta contra pa permiti cu Gobierno - bao di un status di gabinete demisionario of no - ta:
- nombra y “bevorder” personal den servicio di gobierno, companianan estatal y/o institucionan publico cu metanan politico;
 - usa fondonan publico, propiedad, material, equipo y recursonan humano (incluso “ter beschikkingstelling”) di gobierno, companianan estatal y/o institucionan publico pa metanan politico partidario.
6. Despues di e proceso electoral un evaluacion lo tuma lugar. Cu tal objetivo
- a. COMISION lo reuni dentro di 14 dia despues di dia di eleccion pa evalua e proceso electoral. COMISION lo publica su evaluacion.
 - b. PARTIDONAN POLITICO ta entrega na COMISION dentro di 90 dia despues di eleccion un relato financiero di e periodo di campaña conforme reglanan/normanen basico di contabilidad. COMISION lo evalua e calidad di e relato financiero y lo publica e resultado di esaki. En caso di no cumplimiento cu e entrega COMISION lo denuncia esaki den prensa.
7. PARTIDO POLITICO ta compromete pa despues di eleccion, colabora den preparacion y/o ratificacion tan pronto cu ta posibel di ley cu, por lo menos, ta stipula:
- reglanan pa campaña electoral,
 - reglanan pa contribucionnan financiero pa partidonan politico y entrega di un relato financiero di e periodo di campaña;
 - cu ora un persona asumi puesto di ministro o parlamentario mester duna notario un lista di propiedadnan pa comparacion na final di gobernacion.